

21. april

Illumik pisinermut atatillugu illup qanoq innera pillugu naliliinermik sanasoqartalernissaanut inatsisitigut piumasaqaateqalernissamut atatillugu aningaasatigut iluaqutissanik ajoqutaasunillu misissuisoqarnissaa pillugu kiisalu illumik pisinermut atatillugu illut nukimmik atuisarnerat pillugu nalunaaqutsiisarnissap inatsisitigut piumasaqaataalernissaanut atatillugu misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aamma misissuinermi ilanngullugu paasiniaqquneqarpoq sillimmasii-sarfiit piginnittut nikinneranni suleqataanissaminnut piumasaqaatigisinnaasaat kissaataallu. Misissuinerup inernera Inatsisartunut agguanneqassaaq 2017-imi ulloq 1. januaari tikit-sinnagu.

(Inatsisartunut ilaasortaq Justus Hansen, Demokraatit)

Inatsisartuni ilaasortap Justus Hansenip Demokraatineersup aalajangiiffigisassatut siunnersuuteqarneranut Siumumiit qujavugut imaattumillu Siumumiit oqaaseqarfigissavarput.

Siusinnerusukkulli Siumumiit oqariartuutigereernikuvarput soqutigilluinnaratsigu ullumikkut innuttaasut sumiiffippassuarni ineqarniarnerminni atugarisaat pillugit oqallinnissamut peqataasalluta. Matumani aamma illutaarniarnermi atugassarititaasut pillugit pitsanngorsaanissamik anguniagaqarneq Siumumiit ilassilluarusupparput.

Siumup pingaartutut isigaa innuttaasooq kinaluunniit akissaqartitsiffigisaminik, najoruminartumik kiisalu isumannaatumik ineqarnissamut pisinnaatitaaffeqassasoq. Kialaamut iserfissaqarluni angerlarsimaffeqarneq nunami maani pingaaqaaq, taamaattumik ineqarneq illuuteqarnerlu pillugit inatsisitigut pitsanngorsaaajuarnissat Siumumiit pingaaruteqartutut isumaqarfigaarput.

Siumumi ilisimavarput sineriassuatsinni illut amerliartuinnartut inueruttalersut, tamannalu ilaatigut inuit najugaqariaasiannik tunngaveqartoq aamma ilisimallutigu. Taamatuttaaq aamma ilisimavarput sineriassuatsinni illorpassuaqartoq ukiorpassuarni annerusumik aserfallatsaaliorneqarsimanngit-sunik, ilaatigullu tamakkua aamma kingunerai illut pitsaassutsimikkut appasissumik inissittarne-rannik.

Taamaattumik siunnersuuteqartup illumik pisinermut atatillugu illup qanoq innera pillugu naliliinermik sanasoqartalernissaanut inatsisitigut piumasaqaateqalernissamut atatillugu aningaasatigut iluaqutissanik ajoqutaasunillu misissuisoqarnissaannik ilaatigut siunnersuutaa Siumumiit soqutiginaateqartutut nalilerusupparput.

Inuit illutaarniarlutik aalajangeraangamik imaluunniit siunniussaqaaraangamik amerlasuutigit inu-nerminni aningaasaliissutissartik pingaarnerpaaq toqqarsimasarpaat. Siunissami namminerisamik illuuteqalernissaq amerliartuinnartut atugarilersimavaat, tamannalu ineriartorneq pitsaasuusooq Siumumiit isumaqarfigugut.

Pisisussalli illusiassami qanoq pitsaatigineranik imaluunniit pitsaangitsigineranik uppernarsaasik-kamik inatsisitigut tunngaveqartumik takussutissiamik pisinnaatitaaffeqanginnera ilaatigut inunnut ataasiakkaanut ernumanartuusinnaanera Siumumiit isumaqarfigaarput. Oqareernitsitummi sine-

riassuatsinni ilaatigut illoqarpoq aserfallatsaalineqarnermikkut pitsaangitsumik inissisimasunik, taamaattumillu illup isumannaatsuuneranik apeqquusiinnaasumik.

Siunnersuutip, tassalu illumik pisinermut atatillugu illup qanoq innera pillugu naliliinermik sana-soqartalernissaanut inatsisitigut piunasaqaateqalernissamut atatillugu aningaasatigut iluaqutissanik ajoqutaasunillu misissuisoqarnissaa pillugu kiisalu illumik pisinermut atatillugu illut nukimmik atuisarnerat pillugu nalunaaqutsiisarnissap inatsisitigut piunasaqaataalernissaanut atatillugu misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut Siumumiit annertunerusumik paasisaqarfigissallugu isumaqarfigaarput, tassanimit pisartut illersorneqarnerunissaat takussutissinneqarsinnaammat.

Siumumiillu misissunermi ilaatigut annertunerusumik paasisaqarfigissallugit pingaartippagut illup qanoq innera pillugu naliliinermi suleriaatsip qanoq ittuunissaa, kiap imaluunniit kikkut aningaasartuutit matussusissaneraat kiisalu aningaasartuutit naliginnaasumik qanoq naatsorsorneqar-tarnerannik takussutissiamik.

Ilaatigummi naatsorsuutigineqarsinnaavoq illut ilarpassui tuniniagaasut naleqassutsimikkut appa-sissunik imaluunniit sumiiffik pissutaalluni naleqassussuseq appasilluni. Taamaalilluni ilaatigut illup qanoq innera pillugu naliliinerup akilersinnaangitsutut imaluunniit akissaajaataaginnartutut inissinnissaa naatsorsuutigineqartarsinnaammat. Taamaattumik killissat assigiinngitsut misissui-nermi ilanngullugit sukumiisumik nalunaarsorneqarnissaat Siumumiit kissaatigaarput.

Naggaterpiaatigut, sillimmasiisarfiit illumik piginnittut nikinneranni qanoq illuatungeriinnut atugassarititaasunik neqerooruteqartarsinnaanerat annertunerusumik paasisaqarfigissallugu Siumumiit isumaqarfigivarput, sumiluunniimmi pisinermi ersinngitsunik ajoqutinik arlaatigut nalaattaqarsinnaaneq naammattuugassaajuartarmat.

Taamatut oqaaseqarluta siunnersuut Siumumiit ilalerparput ataatsimiititaliamullu susassaqartumut suliareqqinneqarnissaa inassutigalugu.

Anders Olsen,
Siumut